

p. 17.

192
15

7108

L I B R E

DISCOVRS

CONTRE LA

GRANDEVR

E T

PVISSANCE TEMPORELLE

D V P A P E.

Pour la deffence de nostre Roy
tres-Chrestien, & des libertez
de l'Eglise Gallicane.

1626

Case


F

39

.326

1626 Li

LIBRARY
UNIVERSITY



TRAITTE' DE LA PVISSAN- CE DV P A P E

CHAPITRE. I.

AYANT remarqué depuis quel-
que temps qu'en suite de la
censure du pernicieux liure de
Sātarely Iesuite, quelques es-
prits factieux, ennemis de ce-
ste Couronne, taschoient de
gliser parmi nous ie ne sçay quelles opinions de
l'autorité du Pape au des-advantage de nostre
Roy, & du Royaume de France, i'ay creu qu'il
estoit à propos de resister aux vains efforts de ce-
ste caballe, & faire entendre aux François le com-
mencement & le progrez de ceste grande puis-
sance; & par mesme moyen leur représenter les
libertez de l'Eglise Gallicane, & quelles preëmi-
nences nous auons par dessus tous les Estats de
la Chrestienté; Protestant neantmoins que ie
n'entens en rien déroger à la dignité du Pape,
souuerain Pontife de l'Eglise, auquel ie veux ren-
dre tout l'honneur & l'obeïssance qu'un bon Ca-
tholique luy doit.

Premierement, il est tres-vray (& personne ne
peut reuoquer en doute) que nous recognois-
sons le Pape premier de l'Eglise, comme ayant la

superiorité iointe & incorporée à sa dignité : d'autant qu'il importe à toute la Chrestienté , qu'il y ait vn chef , auquel on rapporte en commun , ce qui est de la conseruation du general de l'Eglise. Car si cela n'estoit chaque Euesque en son diocese introduiroit vn pesse-messe de propositions contraires les vnes aux autres , qui en fin bouleuerse-roiét nostre religion. Et combien que nous croyôs ceste primauté , si est-ce que pour cela nous n'auons permis que le Pape acquist en cet Estat plus qu'il y a iusques à présent. Car lors qu'il l'a voulu entreprendre , nous auons opposé les libertez de nostre Eglise Gallicane , conformes à la coustume ancienne de l'Eglise , au droict Apostolique , & Canons des Conciles Generaux & vniuersels. De façon que l'on ne luy a laissé gagner que ce que le droict commun luy donne. Ce neantmoins plusieurs ennemis que nostre France nourrit & eleue dans son sein , sement parmy nous vne Theologie nouuelle , de laquelle nos deuanciers n'ouyrent iamais parler. Que la puissance temporelle de nos Roys despend de celle du Pape , & par consequent qu'il peut disposer de ce Royaume , & deposer le Roy à sa volonté. Meschante , maudite , & malheureuse doctrine. qui ruine nos libertez , rabaisse la grandeur de nos Roys , & tire ses suiets de leur obeïssance. Il faut tenir pour chose arrestée , que l'autorité de nos Roys despend immediatement de Dieu , & non du Pape. Et quiconque enseigne le contraire , veut establir sur nos Roys vn autre Roy , & mettre cette Couronne au ban d'vne passion estrangere pour la ruiner asseruir , ou transferer en autre main. l'aduouie que le Pape est souuerain en ce

qui regarde la puissance spirituelle: puissance toutes-
fois retenue & bornée en France par les Canons
des anciens Conciles, receus en ce Royaume:
Mais en ce qui touche la temporelle, ie nie qu'il
ait rien à y voir. Les Estats de France se sont op-
posez, & virilement & fortement aux Papes, qui
pour s'autoriser, tascherent de planter en nostre
Estat leur pouuoir temporel. La Cour de Parle-
ment a fait le semblable, quand elle fit ses remon-
strances au Roy Louïs II. sur les droicts & liber-
tez de nostre Eglise Gallicane: & quand par ses
Arrests elle a fait faire amende honorable à Iean
Tanquerel, & Florétin Iacob Bacheliers en Theo-
logie, pour auoir soustenu en leurs positions que
le Pape pouuoit deposer les Roys ayant en soy l'v-
ne & l'autre puissance. Il ne se trouue point en
toute la sainte Escriture que Dieu luy attribue
auec la puissance spirituelle, la temporelle quant
& quant sur les Royaumes. On verra bien que Ie-
sus Christ luy oste, quand il enseigne à ses Disci-
ples & Apostres l'incompatibilité qui est entre ces
deux puissances. Il pouuoit tout & neantmoins il
a refusé ceste puissance temporelle, s'estant assu-
jetty aux puissances de ce monde, lors que luy &
la Vierge sa meré se firent enrooler au commande-
ment d'Auguste: lors qu'il paya le tribut à Cesar:
lors qu'il fut prié de iuger le different des deux
freres, qui m'a ordonné & estably vostre iuge,
dit-il? Lors qu'en mourant il veut mourir, non par
la furie des Iuifs, mais par l'aüthorité de Cesar, ou
de son Lieutenant. L'exemple de nostre Seigneur
est suffisante pour condamner ceste domination
Papale sur la Couronne de nos Roys. Les Roys

dit nostre Seigneur dominant sur les nations, mais vous ne ferez pas ainsi. Le Pape n'a autre droit que celuy de saint Pierre & ses successeurs, lequel Iesus Christ borne par ce passage. Et les Apostres ont enseigné cette mesme doctrine. Saint Paul recommande tant qu'il peut l'obeissance deüe aux Roys, & de faire prieres pour leur prosperité & grandeur, comme chose agreable à Dieu : & dit, que qui resiste aux puissances superieures, resiste à l'ordonnance de Dieu, duquel elles deriuent, & non d'autre. Luy mesme accusé, ne decline la iurisdiction de Felix & Festus, ains appelle deuant Cesar, se soubmet deuant Agrippa. Et tout cela pour seruir de leçon à ses successeurs. Saint Pierre duquel les Papes sont heritiers, retrâche & condamne ceste domination, quand il prie les anciens de paistre le troupeau de Christ, non point comme ayant seigneurie sur le peuple élu du Seigneur, mais pour estre exemple du troupeau. Et luy mesme receut seulement de nostre Sauueur les clefs des cieux, lesquelles il resigna à ses successeurs. Car comme dit saint Paul, personne qui bataille à Dieu, ne s'empestre aux affaires seculieres, afin qu'il plaise à celuy qui l'a élu pour batailler. Il scauoit que ces deux puissances ne pouuoient compatir ensemblement. En consequence dequoy les Papes, pendant huit cens tant d'années, ne prindrent iamais la domination temporelle sur les Royaumes. Ce grand S. Gregoire en ses epistres appelle l'Empereur Maurice son seigneur, & se reconnoist son sujet, avec protestation de demeurer tousiours en son obeissance. Pelagius soubçonné d'heresie rend compte de sa foy au Roy Childebert, reconnois-

sant que l'Escripture sainte luy commande d'obeïr aux Princes souuerains. Charlemaigne fait Empereur fut adoré par le pape Leon selon la coustume des princes anciens. Et Leon 4. accusé deuant Loys le Debonnaire se soubmit à son iugement. Les papes en ce temps là n'entreprenoient de des-throner les Roys , & donner leurs Estats au premier occupant. Ains au contraire les Empereurs priuoient les papes de leur siege , quand il leur plaisoit , pour en establir de nouueaux en leur place. Alexandre enuoya Pontian 1. en exil : Honoré chassa de Rome Boniface & Eulule : Constantin, Liberius, au lieu duquel il establit Felix : Belisaire par le commandement de Iustinian priua Siluerius, & promeut en son lieu Vigilius : Constantin 3. Martin 1. Othon 1. Iean & Benoist : Othon troisieme, Leon 8. Henry 4. Benoist 10. & Gregoire 7. & Federic Barberouffe, Alexandre 3. Je tais plusieurs autres semblables exemples , desquels l'histoire est plaine. Les Empereurs donc les destituoient & reestablissoient à leur volonté : & outre cela ils ne pouuoient quant & quant estre promeus au rapat sans la confirmation de l'Empereur. Saint Gregoire ne s'osa iamais honorer de ce tiltre, qu'apres auoir pris lettres de confirmation de luy. Tous les autres papes rendirent le mesme deuoir , iusques à ce que le Debonnaire , plustost ignoramment, que par aucune iuste & legitime raison, remit entre les mains des papes la faculté de les eslire & restituer. D'où sourdirent apres ces grandes guerres des Empereurs d'Allemagne ses successeurs , pretendans qu'à leur preiudice ce prince n'auoit peu renoncer à ce droit , comme estans de

l'essence, nature & domaine de l'Estat Imperial. par tout ce discours l'on voit à l'œil, que nostre Seigneur, les Apostres, & les papes pendant plusieurs siècles, n'entreprendrent sur la temporalité des princes. Aussi que Iesus Christ à sa venue; pour oster la crainte que les Roys en pouuoient auoir, declara qu'il ne tenoit rien de mortel : pour ce que son regne estoit au Ciel : & qu'il falloit rendre à Cesar ce qui estoit à Cesar : ce qui montre que le Christianisme n'est point vn affrâchissement aux sujets, ny vne subuersion en l'Estat temporel. Et Leon écrivant au Debonnaire luy mande, comme les Roys president sur les choses du monde, de mesme les prestres sur les choses de Dieu. Et tout ainsi que ces premiers papes ne destituoient ny Roys, ny Empereurs de leursempires & Royaumes, ny les mettoient en interdit, ny abandonnoient en proye au premier occupant. Aussi ne scauoient-ils que c'estoit de les excommunier, quoy qu'ils fussent heretiques. Constance & Valens, heretiques Trinitaires, Theodose 2. & Valentinian 3 Eutichiens : Iustinian 2. Chilperic Roy de France Theodoric Roy des Gots, & les Ostrogots dominans en Italie, mesme à Rome, Lombards, & les Vuisegots qui long-temps regnerent en Espagne, & les Vandales en Affrique Arriens, ne furent point excommuniez. Il est vray qu'en la premiere integrité de l'Eglise, iamais pape n'entreprit d'excommunier aucun prince. Gregoire 3. excommunia Leon, il y a 865. ans pour auoir defendu les Images. Excommunication qui fût sans fructs, d'autant que les Grecs sujets à Leon n'en firent aucun estat. L'Eglise Grecque estant dé-
pièce

pieça separée de la Romaine. Lōgues années apres
 les Papes s'estās accreuz pied à pied iusques à vne
 merueilleuse & démesurée grandeur, commence-
 rent sous la 2. & 3. lignée de nos Roys à excommu-
 nier Lothaire, Charles le Chauue, Philippes 1.
 Louys le Gros, Philippes Auguste, Philippes le
 Bel, Charles 6. Louys 12. Henrys 3. & 4. Mais de
 toutes ces excommunications les François en fi-
 rent si peu d'estat, que les Prelats manderent au
 Pape, s'il venoit en France pour excommunier
 leur Roy, que luy mesme s'en retourneroit exco-
 munié avec ses bulles & fulminations qui estoient
 contre les anciens Canons. Et les Estats perdirent
 tellement patience, que surmontez d'une iuste co-
 lere, & esmeuz de leur obeïssance legitime, luy es-
 criuirent que les Empires ne s'acqueroiēt pas par
 ses excommunications, & qu'ils combatteroient
 pour la liberté du Roy & du Royaume iusqu'à la
 mort. Mesmes que nous fūsmes prendre le Pape
 prisonnier en Italie, luy liurāsmes la bataille qu'il
 perdit. De plus on mena ses Legats à diuerses fois
 dans des tomberaux depuis la prison iusques en
 la place publique, où vestus de tuniques de toille
 peinte, & mitrez de mitres de papier furent es-
 chaffaudez & preschez, avec les Prelats François
 qui les fauorisoient, lesquels chassiez de leurs bene-
 fices, furent à mandier leur pain. Et apres tout ce-
 la leurs bulles furent brulées par Arrest de la Cour.
 Voila la voye que nous auons tenuē quand le Pa-
 pe a entrepris d'excommunier nos Roys. Car l'o-
 beïssance & subjection volōtaire des François en-
 uers leurs Princes naturels n'a oncques esté dimi-
 nuée par ces censures : pour ce que nous auons

tousiours creu que les successeurs de S. Pierre au
 Papat, n'auoiēt acquis en ces derniers tēps plus de
 puissance que celle qui leur auoit esté laissée. Et
 quant & quant que tous ces bons vieux Papes ius-
 ques au nombre de seize iurerēt la cōseruation de
 nos Roys & de leur Courōne, & declarerent qu'ils
 ne pouuoient estre excommuniez, ny la France in-
 terdite, selon les grandes libertez & prerogatiues
 du Royaume, desquelles ils auoiēt esté amplemēt
 informez, en consequence de quoy ils decreterent
 leurs bulles, plustost declaratoires que constituti-
 ues de ce droit né avec nous. Toutesfois combien
 que nostre Roy ne se puisse excommunier par le
 Pape, si veux-je par forme de presuppositiō accor-
 der qu'il le peut estre. Mais ie nie que son excom-
 munication ait la force d'interdire son Royaume,
 ny de deliurer ses sujets du serment de fidelité, qui
 les tient obligez & liez à leur Prince; d'autant que
 l'excommunication va au spirituel, & la disposi-
 tion des Royaumes au temporel, où le Pape n'a
 que voir par le droit diuin. Quand saint Paul ex-
 communia le Fornicateur, il n'ordonna de son
 bien, ny priua ses enfans de la succession. Saint
 Ambroise Euesque de Milan excommunia Theo-
 dore, pendant son excommunication, il fut tousiours
 reconnu pour Empereur. Car jaoit que l'Eglise
 ait iurisdiction sur les Roys, cette puissance ne s'e-
 tend sur les Royaumes. Les Roys sont dans l'Egli-
 se, & non le Royaume: Il est donc hors du pou-
 uoir del'Eglise, & du Pape. C'est l'Eglise qui est
 dans le Royaume. Que s'ensuit-il de là? C'est que
 tant s'en fait que le Pape ny l'Eglise ait rien à voir
 sur les Royaumes, qu'au contraire les Roys ont

puissance sur l'Eglise, parce qu'elle est d'as le Royau-
me. Mais pour reuenir à l'operation de l'excom-
munication, elle retréche la personne des œuvres
pieuses qui se font en l'Eglise & de sa communion,
sans qu'elle s'estende iusques à la deietter & priuer
de son bien : elle agit contre l'amé separée de la
grace de Dieu, & non contre le bien. C'est pour-
quoy qu'ad on veut en vser cōtre quelqu'un il faut
prudemment iuger de sa condition, & meuremēt
cōsulter, s'il est si malade, que le mal requiere cer-
te violence ; & outre prattiquer la patience, y ap-
pliquer les reprehensions, & ne mettre en œu-
re le trenchant de la censure, qu'apres qu'on ver-
ra la chair pourrie tomber à demy d'elle mesme
par vne faute incorrigible & indisciplinable, ny
n'employer qu'avec larmes & regrets ce remede
mortel, qui emporte la vie avec sa blesseure. Et
combien que tout cela ait esté fait, si faut-il que
l'Eglise prie Dieu pour luy sans aucune entrecesse,
afin qu'il obtienne son pardon & la grace de Dieu,
par laquelle il merite en fin d'estre réüny en la cō-
pagnie des fideles, Et quand l'Euesque est cōtraint
& comme forcé de ietter son excommunication
cōtre le déuoyé, apres qu'il a gardé les formalitez
que i'ay deduites, il y doit proceder avec l'Eglise.
Samosatenus fut excommunié, & Nouatianus
quant & quant par toute l'Eglise. Iesus-Christ ne
voulut pas seul cōdamner la femme paillarde. Les
Apostres estoient tous ensemble au gouuernemēt
de l'Eglise : David | prenoit conseil des principaux
du peuple : Moyse estoit tenu d'assembler le con-
seil d'Israël : Quand nostre Seigneur dit a ses Apo-
stres ; *Quacumque ligaueritis, &c.* il ne parle pas à

eux comme particuliers, ains il donne ce pouuoir à tout le corps de son Eglise. Et s'il est permis d'excommunier nostre Roy, ce n'est au Pape de l'entreprendre à Rome, pource qu'il passeroit les bornes de sa iurisdiction. Car il ne s'enfuit pas que le Roy pour estre enfant de l'Eglise, & dās l'Eglise, ce soit au Pape à l'ē metre dehors, & le priuer du Royau-me spirituel de sa mere. Il n'est point seul l'Eglise, il faut laisser cete Iustice à l'Eglise Gallicane, laquelle elle pratiqua contre Philippes 1. au Concile tenu à Clermont, le Pape Urbain 2. present : & contre Philippes Auguste, assistant le Legat du Pape Celestin 3. Car comme le Roy est fils de l'Eglise, il est quant & quant iusticiable de l'Eglise, & sujet à sa correction maternelle. Vray & vnique moyen pour ramener les Roys à la raison, lors que s'abandonnans à vne licence déborbée, ils abusent licentieusement de l'autorité & prééminence qu'ils ont sur leurs peuples. Quant Iules 1. se voulut mesler des excōmunications des Euesques d'Orient, tous les Euesques luy escriuirent qu'il n'y auoit rien que voir, que c'estoit hors son territoire, & qu'il se contentast du gouuernement de ses sujets. Que lors qu'il excommunia Nouatus, Prestre de l'Eglise Romaine, ils ne s'en entremirent, & qu'il vst enuers eux de mesme respect & modestie. Ils firent plus, car ils le menacerent de l'excommunication, ce qu'en fin ils effectuerent en plein Concile. Lors que les Dioceses furent par les Apostres & leurs successeurs diuisez, l'ordre & les loix Ecclesiastiques portent que chacun face sa charge en son Diocese, sans que les vns enjambent sur les autres. Qui excommunia Theodose ? Saint Am-


broise. Vous voyez par tout ce discours, comme nos Prelats escriuirent courageusément aux Papes entreprenans d'excommunier nos Roys, & de quel traitement ils ont esté d'aduis avec la Noblesse & les Parlemens de traiter, & leurs Legats & leurs bulles, Toutes les excommunications qui sont venuës des Papes seuls contre nos Rois, ont esté tres-mal receuës en ce Royaume, d'autant qu'ils sont hommes, & qu'en cette qualité ils se peuuent courroucer, passionner, alterer, tromper, & méprendre en leurs actions & iugemens, quelquesfois inconsiderez. Si que la consequence & l'exemple est trop important & dangereux pour nostre Roy, s'il falloit que sa personne fust esclau de la trop chaude colere, de la fureur & de la mauuaise volonté, ou de la faulxse persuasion d'un seul homme, sujet aux mouuemens, alterations, passions immoderées de la corruption de nature, & qui en sa dignité n'a depouillé les fragiles affections de son humanité. Comme nous voyons Constantin 1. qui voulut venir à la déconfiture de l'Empire, avec toutes les autres nations, & participer à sa dépouille : & pour y paruenir excōmunia Philippe, & à la suite mit l'Empire en interdit. L'Empire esbranlé de ce coup, donna l'enuie à Gregoire 3. de paracheuer, & prenant l'occasion excōmunia Leon Ysaurien, lequel il priua des biës qu'il auoit en Italie, defendant à ses sujets de luy obeïr, ny payer aucun tribut, lesquels à cette fin, il affranchit de toute seruitude : & se fit declarer Duc & Prince de Rome par les Romains, qui luy iurerent obeïssance & fidelité. Robert Guichard, Capitaine & Chef des Normans,

occupa sur l'Empire Grec la Pouille & la Calabre & voulant estre sa conqueste plus loing, prit Be-
neuent sur Nicolas second, qui aussi tost le fou-
droya de ces censures; si qu'il fust contraint de ré-
dre ladite ville, & luy faire de là en auant hom-
mage de la Pouille & Calabre. Adrian 4. ayant ex-
communié Guillaume le Normad, acquit le droict
de fief dominant sur la Sicile. Federic 2. Roy de
Naples & de Sicile fut excommunié par Cle-
ment 5. & ses Royaumes donnez au premier
occupant, lesquels Charles Comte de Prouence
& d'Auignon, frere du Roy S. Louys, conquist à
la faueur du Pape, duquel il prit l'inuestiture. Le
Roy Iean Sansterre, frappé des censures d'Inno-
cent troisieme, ayn. a mieux rendre son Royaume
d'Angleterre, hommager & tributaire du Pape,
que de le defendre contre les armes Françoises. Et
côme par ces censures le Pape se rendist ce Royau-
me tributaire, & qu'un mesme remede produit
quant & quant des effets contraires selon la diuer-
sité des dispositions, vne autre censure fulminée
par Clement septiesme contre Henry 8. fit perdre
la spiritualité & temporalité d'Angleterre. Il se lit
fort peu de Roys & Princes excommuniiez par les
Papes, desquels ils n'ayent tiré quelque profit par
forme de satisfaction, comme si leur but en telles
excommunications estoit d'augmēter sous le pre-
texte d'icelles leur autorité, & chercher plus leur
bien que la gloire de Dieu, ny la paix del'Eglise.
La France plus heureuse, plus forte, & plus ver-
tueuse que les autres Royaumes, & qui ne s'est
iamais dementie de l'obeïssance & fidelité qu'elle
doit à ses Roys, n'a donné ce passedroit aux ex-
communications, car elle s'en porta pour appellā.

te au Concile futur: appellations qui sont conformes à la police de l'Eglise & cōstitutions des saints Conciles, & qui suspendent l'effect de l'excōmunication. Et d'autant que ces appellations estoient d'une durée sans fin, nous eūmes recours à l'appel comme d'abus, lequel se traite en la Cour de Parlemēt, qui cognoissant de l'abus, declare telles bulles abusives. Les formes que nous auons gardées en France iusques icy cōtre les Papes qui ont entrepris contre nos Roys, doiuent bien faire consulter le Pape en soy-mesme, premier que de ietter vne excommunication contre quelque Roy ou Prince. Il la doit peser & balancer avec les forces de celuy qu'il veut excommunier, & l'obeissance volontaire que luy rendent ses subjects & s'il cognoist qu'il ait vne puissance solide & entiere, tant par la force de ses armes, que par la bienueillance de ses subjects, & par vne bonne constitution de loix, establies en cē Royaume, c'est à luy à s'abstenir de ce remede, de crainte que voulant guarir vn mal, il n'en irrite & prouoque vn plus grand, comme il arriua en Angleterre. Le Pape a vn notable interest de cōseruer son autorité en cette haute grandeur, ce qu'il fera, en ne fulminant point d'excommunications qu'il ne puisse faire executer. Il est plus seur & plus honorable à vn souuerain de ne point faire d'ordonnance, que de la faire, pour n'estre point executée & gardée. De plus cette frequence de censures qui ne porte point de coup, se tourne en mépris, ainsi que nous voyons estre arriué en France. Et quoy que les Papes se soient merueilleusement aggrandis par ce remede, si s'est-il trouué plus nuisible à la Papauté

que profitable. Car de luy nous auons veu naistre les schismes, heresies, & des guerres horribles & cruelles, qui ont laissé vne memoire des Papes tres-funeste, pour auoir esté auteurs des cédroyemens des Empires & Royaumes, & de la decaden-
ce de la dignité Papale & du Siege Apostolique, par les Estats & Principautez qui se sont tirées & soustraites de son obeïssance. Comme entre autre la Grece, l'Allemagne, l'Angleterre, vne grande partie de la France, Nauarre, Boëme, & tout l'Orient, & en general quasi toutes les autres natiōs, de façon que ie crains que le proverbe se trouue veritable. Que qui veut tout, perd tout. Mais si le Pape desire de tout point bien faire, qu'il n'ait en consideration que le salut des ames, & vse simplement des remedes portez par la doctrine Euan-
gelique, sans se laisser aller à vne passion démesurée : car si pour satisfaire à vne affection desordonnée, il mes-vse & de la doctrine & de son autorité, sans peser que Dieu luy a mis entre mains, cette souveraine dignité spirituelle pour le salut des ames, non pour priuer les Rois de leurs Estats, il n'en peut arriuer autre frui& qu'un signalé malheur, & trouble à toute la Chrestienté, avec vne cheute dommageable à la Papauté. Pour me recueillir en vn mot, nous dirons que le Pape hors de France, & sans l'Eglise Gallicane, ne peut excommunier nostre Roy, ny le priuer aucunement de son Royaume. En laquelle franchise & liberté tous ses predecesseurs se sont tellemēt maintenus & defendus, que quād les Papes y ont voulu faire bresche, par quelque débordement ou entreprise, ils ne l'ont souffert : si qu'en fin mieux aduisez, ils
ont

recoëgneu cette liberté & nos Roys & leurs subjets pour tres-Chrestiens , vrayz Catholiques enfans de l'Eglise. Doctrine qui est conforme au droit commun à la parole de Dieu , aux sainctz Decrets, determination des Conciles aux libertez de nostre Eglise Gallicane , aux sainctes & anciennes coustumes, ordonnances & vsances du Royaume. Je m'asseure & croy que ceux qui aymeront & le Roy & l'Estat renouelleront & resusciteront cette vieille doctrine née avec la France, tant aimée, chérie & deffenduë par nos deuanciers : laquelle certaines viperes , rampantes en ce Royaume veulent abastardir & perdre , pour esleuer le Pape à la diminution de nostre Roy, & faire que ces moyens d'excommunication & d'interdit , soient autant de moyens pour enuahir son estat. Je diray icy ce qu'escriit S. Augustin au Pape Celestin 3. Qu'enuoyer ses Legats plüstoit executeurs de sa volonté, que de sa puissance , c'est vendre la fumée au monde, & estouffer la simplicité de l'Eglise.



DES LIBERTEZ DE L'EGLISE GALLICANE.

CHAPITRE II.



Plusieurs Prelats , qui tiennent & les premieres dignitez en cët Estat, & les plus eminentes charges dans le Conseil du Roy , font littiere des libertez de nostre Eglise Gallicane : afin qu'esleuant le Pape plus qu'il n'a iamais esté en France , ils contentent

& assouissent leur aueugle ambition. Ainsi que nous auons veu de fresche date, que contre l'ordre & les loix de France, de pauvres Religieuses ont esté contrairement forcées d'aller plaider à Rome, après qu'un relief d'appel comme d'abus leur fut refusé, & les Parlements interdits. Je sçay que ceux qui aimeront la France, prendront plaisir en la lecture de ce discours, lequel comprend en soy briefuement la naissance & l'entretien de nos libertez. Mais pour en sçauoir veritablement la source, il est necessaire en premier lieu de toucher comment les Papes se sont acquis ceste grande puissance de laquelle ils iouissent: puis les entreprises par eux faites en cest Estat, & comme nous auons esté contrains de mettre en œuvre nos libertez pour en détourner l'effort. Pendant les quatre ou cinq premiers siècles, les Papes basterent le plan de leur grandeur sur la sainteté, pauvreté, les afflictions & martyres, afin d'auoir le Ciel pour lot de leur passage. A succession de temps ayans épousé la terre, ils s'estudierent par toutes sortes de moyens de monter à l'extreme grandeur, à laquelle ils se retrouuent auourd'huy. Pour y paruenir ils se seruirent de la décroissance des Euesques d'Orient, qui en leur aduersité se retiroient par deuers eux, comme à un port assuré de leur salut: & des griefs que faisoient les plus puissans aux plus foibles, qui pour les faire reparer, se pournoyent par deuant le S. Siege, où ils receurent toutes sortes de fauorables accueils. A mesure que leur autorité creut, il commirent en ceste charge, personnages non seulement nourris aux affaires Ecclesiastiques, mais d'Estat, lesquels s'aduancerent

grandement au defaduantage de tous les Euesques. Au Concile de Nice , la preeminence leur fut accordée. A celuy de Constantinople il fut arresté que la premiere seance leur appartenoit. Au Concile de Chalcedoine Leon fut le premier honoré du tiltre vniuersel: toutesfois ny luy ny ses successeurs ne mirent long temps apres ce tiltre en vsage. Et au 6. Concile de Constantinople le Pape & le Patriarche Constantinopolitain furent diuersement appelez, l'un œcumenique, l'autre vniuersel: neantmoins en cette concurrence des tiltres, les Legats du Pape furent nommez les premiers en la soubscription, & apres eux les trois autres Patriarches. Les Empereurs s'estans retirez de Rome à Constantinople, décheurent avec le temps de leur grandeur, & déclina quant & quant l'autorité du Patriarche, ce qui fut l'accroissement du saint Siege. Car en ce rual & de l'un & de l'autre se trouua l'esleuement du Pape à Rome, qui s'empara & du spirituel, & du temporel. A la suite, les Patriarches d'Alexandrie, d'Antioche, & Ierusalem furent de telle façon abbaissez, que nostre Religion Chrestienne perdit presque son cours par tout le Leuant, si que ces Patriarches ne retenans plus que l'image de leur dignité, la grandeur de l'Eglise vniuerselle fut deuoluë par effort en la dignité Pontificale de Rome. Où tous les Prelats commencerent à recourir, estant question de les regler sur le different de quelque poinct de religion, ce qui augmenta grandement leur autorité. Si que se voyans les Papes accreus en puissance ils entreprirent diuersement sur les Euesques, dont Sainct Cyprian se plaignit: Et en France tau-

tost le Clergé en reprit Eleuthere, tantost S. Ire-
 née Euesque de Lyon, Victor. Pendant tous ces
 temps-là les Papes ne songeoient qu'à s'auancer au
 desaduantage des Euesques, sans penser de donner
 loy aux Empereurs & Roys. Mais comme plusieurs
 Princes & Roys s'ayderent diuersement de leur au-
 thorité spirituelle pour ruiner leurs ennemis, ils
 prindrent si bien leur temps, que de là en auant ils
 firent trembler les plus grands Monarques du mon-
 de, mesme vacquer les Empires & Royaumes,
 tant a depouvoir sur nous le pretexte de Religion
 mesné à propos, en quoy on recogneut de l'hom-
 me à bon escient. Sous la premiere lignée de nos
 Roys, l'autorité du Pape n'estant recogneuë en
 France, on n'auoit recours à luy. Car toutes nos
 affaires Ecclesiastiques se passoient par Synodes
 nationnaux ou prouinciaux, l'ouerture desquels
 dependoit de la seule autorité du Roy, & en suite
 sa confirmation estoit requise. Cela se faisoit
 sans nous des-vnir, quant à la foy de l'Eglise Ro-
 maine. Forme de Concile que nous empruntasmes
 del'Eglise primitiue, & continuasmes de pere en
 fils, laquelle l'Eglise vniuerselle depuis approuua
 quoy que l'autorité des Papes ny fust interuenue.
 Sous la seconde lignée de nos Roys les Papes com-
 mencerent à prendre pied en ce Royaume, & s'y
 accroistre en prerogatiue & grandeur. Car plus
 d'autorité ils y auoient, & plus Pepin confirmoit
 la Royauté, freschement acquise à sa famille par
 l'aduis de Zacharie, à la ruine de la premiere. Les
 chants & ordres Romains que Charlemaigne y
 introduisit, donnerent aux Papes grand credit : car

souuent il les falloit aller trouuer à Rome, comme oracles, des doutes suruenus à l'observation de cet ordre, & communiquant souuent avec les François, en ces entreueuës ils s'attribuerent plusieurs puissances & sur nos Roys, & sur nos Prelats. Sur les premiers, en entreprenant licentieusement de les vouloir excommunier, & interdire de fois à autre leur Royaume. Sur les autres, en se voulans rendre de tout point sujets, & comme dependans de leur seule volonté. Je puis asseurément dire que la seule ambition & de nos Roys & de nos Prelats, a produit le grand pouuoir qu'ont aujourd'huy les Papes en France. En faict d'Estat, l'ambition fait que les Princes s'accomodent à tout ce qu'ils estiment leur estre aduantageux, sans regarder à autre consequence qu'à l'effect de leur pretention. Charles le Chauue fut le premier, lequel fait Empereur par Jean 8. renonça à l'election des papes & autres choses qu'il tira à son aduantage & de ses successeurs au Papat. Pour recognoistre ce bien-fait, il conuoqua vn Concile, où il se trouua en personne, & le Legat du Pape, qui fit faire lecture des la premiere seance, des Bulles Apostoliques, par lesquelles le Pape permettoit l'ouuerture du Concile: à quoy toutesfois s'opposerent les Prelats, quoy que le Roy fust present, lequel ne peut rien remporter de ce qu'il desiroit pour la grandeur du Pape. Ce qui seruit encor grandement à authoriser les Papes en France, ce fut que depuis le Chauue iusques à Capet ce n'estoit vne vraye face d'Estat, ains preparatif general de changement, pendant lequel l'authorité de l'Eglise & des Prelats diminua, &

celles des Papes acrent en telle grandeur: que leurs ordonnances quelques qu'elles fussent, tenoient lieu de loy, de sorte que chacun les recherchoient pour faire sortir effect a leur ambition. Vn Prelat auoit-il receu quelque grief de son confrere: il se pouruoit par apres au saint Siege où le Pape l'embrassoit fauorablement, soustenant les foibles Ecclesiastiques contre les forts en puissance, pour semondre vn chacun à le reclamer. Les choses passées de la façon sous les deux premieres lignées de nos Roys, vini la troisieme qui est le comble de l'agrandissement des Papes. Car nostre Eglise estant tombée en desordre par le peu de soin qu'auoient les Euesques de la discipline Ecclesiastique, par les Abbayes indifferemment données aux gens laiz & seculiers, par plusieurs ordres nouveaux de Religieux qui se fonderent, par plusieurs Chapitres qui s'establirent, dont aucuns les Papes affranchirent des ordinaires pour se mettre sous leur protection, & les autres des dixmes, qui estoient naturellement deuës aux Curez, par les Pardons & Indulgences qu'on alla chercher à Rome par la confirmation de tous nouveaux ordres de Religion. par canonization des ames beatifiées: par la planiere ouuerture des Conciles generaux, & plusieurs autres choses de mesme estoffe que l'on creut appartenir aux Papes par les resignations des Benefices, ou vaccans par mort, pour lesquelles on se pouruoit en Cour de Rome, ou pardenant les ordinaires; par les permutations des benefices, retention de pension sur iceux, pour lesquelles on alloit à Rome, par les dispenses d'aages, pluralité des benefices, changement de regulier en com-

mande. & de commande en regulier qu'on y alloit
rechercher. Les Papes ayans desia cette autorité
en France, nos Roys, ou ceux qui gouvernoient
l'Estat furent encores le sujet qu'ils entreprirent
de plus en plus. Car les Papes permettant qu'ils
leuassent Decimes sur le Clergé, sous les pretextes
d'outre mer ou quelque autre, eux conuiuoi-
ent aux graces expectatiues & prouisions extraordi-
naires des Papes sur les Benefices, & aux exactions
qu'ils faisoient sur les Benefices. Clement 5. venu
en Auignon à la semonce de Philippes le Bel, esta-
blit le desordre des mandats & graces expectatiues
tant generales que particulieres, des exactions, des
visitations, annates, des morts, de la moitié du
reuenue de tous Benefices pour l'entretenement de
son Estat, & de ses Cardinaux, sur peine de priua-
tion totale des Benefices à ceux qui s'y oppose-
roient, de l'Arrest de tous les biens meubles & im-
meubles du benefice decreté, desquels il s'appro-
prioit, sans en rien reseruer, ny pour la reparation
de l'Eglise, ny pour payer les debtes du defunct, du
reuenue du premier an qu'il prenoit de tous les be-
nefices vacans par mort, resignation, permutation,
en regale ou patronage lay. Quand en France on
vit ces charges insupportables qui venoient en fou-
le de la Cour de Rome, saint Louïs, Philippes le
Bel, Charles 5. 6. 7. & 9. Loys 11. & 12. & tous
nos autres Roys se reunirent, & comme prote-
cteurs, conseruateurs, patrons & fondateurs princi-
paux des Eglises de ce Royaume assemblerent se-
lon la liberré née avec l'Estat, les Princes de leur
sang, Prelats & gens d'Eglise, par l'aduis desquels
ils etablirent Pragmatiques, Sanctions, Regles,

Statuts , Edicts Ordonnances pour maintenir en integrité la discipline de l'Eglise Gallicane , remédier aux abus , excez , scandales , maluerfations des Prelats , & entreprises du sainct Siege. Cet ordre gardé , fit nommer la France pays de liberté , & non d'obeïssance , comme sont l'Allemagne , l'Espagne , l'Italie , l'Angleterre , l'Ecosse , Lorraine & autres. Pour laquelle obeïssance on a veu les troubles nais en la plus part de ces païs là , suivis d'un funeste cendroyement. Si que nos Roys enseigneur par le triste peril d'autrui ont maintenu les franchises & libertez anciennes del'Eglise Gallicane, lesquelles à leur sacre ils promettent de conseruer & entretenir. Et tant que nostre Eglise a esté gouuernée de la sorte , elle a retenu la liberté ancienne telle qu'elle est portée par la loy de Dieu & les Conciles vniuersels , & n'y a eu que la puissance absoluë du Pape receuë en ce Royaume qui a produit tout le mal qu'elle a enduré. Pour auquel donner quelque remede & l'affranchir du joug de cette seruitude , & la rendre la plus pres qu'on a peu de cette ancienne & canonique liberté , nous auons tousiours eu recours à nos libertez , que nous tenons en pleine propriété de Dieu & de la sainte Escriture, lesquelles ne sôt autre chose que le droit commun & ordinaire , reglé par les ordonnances de nos Roys, Arrests de la Cour, & anciens Decrets de l'Eglise vniuerselle qui se rapportent à la police , aux regles & statuts que tant les Apostres que les Peres donnerent à l'Eglise , qui est la vraye & pure liberté, que les Parlemens ont reduite aux quatre premiers Conciles œcumeniques & autres que ceux-là confirment. Nos libertez sont;

Que

Que le Roy ne peut estre excōunié par l'authorité seule du Pape : qui ne le peut faire que par luy ou son Legat en l'assemblée des Prelats de l'Eglise Gallicane, comme nous apprenons par trois ou quatre exemples portez par nos Histoires. Que le Pape ne peut interdire nostre Royaume, ny disposer des choses temporelles : ny deleguer pour cognoistre de ce qui concerne les droicts, prééminences & priuileges de la Couronne de France & ses appartenances, & quand il l'a voulu entreprendre soit au premier chef, soit en ces derniers cas, ses bulles & Legats furent mal-traitez. Que le Concile general & vniuersel légitimement assemblé, est par dessus le Pape: lequel tient immediatement sa puissance de Dieu, & a droit de reformer l'Eglise tant au chef qu'aux membres, en quoy est comprise le Pape, lequel il a souuent depose, & establi vn autre en sa place. Que nos Roys ont puissance de reformer l'Eglise & faire garder son droit au cas que les Ecclesiastiques n'apportent le soin, la diligence, pureté & sincerité au maniement des charges à eux commises conformément à leurs Loix, Regles & Canons. Autorité qu'ils se sont tousiours conseruée en conuoqués Conciles Nationaux ou Prouinciaux pour oster les maluerfactions & coustumes vicieuses qui par trait de temps se sont coulées en l'Eglise, comme il appert par nos Conciles, Loix & Ordonnances de nos Rois. Que le Pape ne peut rien faire ny entreprendre au prejudice des quatre Conciles œcumeniques & autres approuuez de France, des ordonnances & droicts du Roy, des coustumes du Royaume, de la iurisdiction temporelle & Arrests de la Cour

Que les François ne peuuent estre tirez hors de France pour plaider à Rome, ains par deuant les Iuges ordinaires ordonnez de droict, & en cas d'appel Iuges deleguez du Pape en la part du Royaume. Que le Legat du Pape ne peut entrer en France, ny vser de ses facultez, sans qu'il ait obtenu lettres du Roy, lesquelles avec les lettres de legation doiuent estre verifiées en la Cour, le Procureur general du Roy ouy, afin qu'il n'y ait choses dérogeantes aux saincts decretz, droicts & prerogatiues du Roy, franchises & libertez de l'Eglise Gallicane, Ordonnances Royaux & Arrests de la Cour: En fin toutes nos libertez aboutissent à ce point, que le Pape ne peut cognoistre des choses temporelles, & combien que nous le recognoissions souverain es spiritualitez, toutefois en France sa puissance souveraine & absolue n'est point recogneüe, mais bornée par les Canons des anciens Conciles de l'Eglise receus en ce Royaume, contre lesquels entreprenans & contre la liberré, paix & tranquillité de l'Eglise Gallicane, contre le bien public de l'Estat, contre les sainctes & antiennes coustumes, concordats, ordonnances, vsances & determinations du Royaume, de l'Eglise, Arrests de la Cour, le Roy ne ses sujets ne sont tenus de luy obeir. Car contreuenans à l'un de ces cas, anciennement on en appelloit au futur Concile general, lequel suspendoit l'effect des Bulles des Papes. Depuis on se porta pour appellant comme d'abus, & de tout ce qui se tourne plus à la destruction qu'edification de l'Eglise, & generalement de ce qui deriue du saint Siege, preiudiciable à nos libertez. Ces ap-

pellations veritablement ne derogent ny aux prerogatiues, ny aux puissances & honneurs qui sont deuës au Pape, mais conseruent la discipline de nostre Eglise Gallicane, & empeschent la corruption qui s'y pourroit glisser. Les Papes considerans que nos Roys vouloient conseruer nos libertez suiuant les pragmatiques Sanctions & ordonnances, & qu'a cela opiniattement ils s'y a-heurtoient, (qui estoit en effect empeschier qu'il ne tirassent nos deniers de France à Rome) Leon 10 trouua tant que luy & le Roy François 1. firent vn concordat par lequdl chacun eut ce qu'il demandoit Henry 2. en eut la continuation. Aux Estats d'Orleans defences ayans esté faites de transporter ny or ny argent à Rome (qui est le grand grief du saint Siege) Charles 9. les leua. Depuis le reglement du concordat s'est tousiours obserué: hormis qu'aux Estats de Blois tenus en 1577. il fust ordonné qu'aduenant vacation des Abbayes Chefs d'ordre il y seroit pourueu par élection des Religieux. Les choses ayans passé de la sorte iusques à huy, ie croy que de là en auant le Pape & le Roy doivent viure comme ils ont fait, sans rien remuer ny alterer, puis que l'un & l'autre sont contens. Apres tout ce discours ie diray que nous recognoissons en France l'Eglise Romaine comme, premiere, vniuerselle & Catholique, en ce qui concerne la foy & la religion Chrestienne: & nostre Roy comme ayant la dignité Sacerdotale & Royale jointe, & la surintendance sur la discipline Ecclesiastique de l'Eglise Gallicane, lors que le Clergé se rend negligent à la faire: en fin selon l'exigence des cas donne or-

dre sur l'Eglise en ce qui est de la discipline. C'est pourquoy & le Pape & le Roy , sçachant ce qui est de leur charge, doivent estre soigneux , en tant que c'est la paix & le repos de l'Eglise , d'entretenir le concordat par la mesme voye qu'il à esté entre-tenu iusques icy. Car l'enfreignant ou rompant , ce ne peut estre qu'au dommage notable de toute la Chrestienté, & particulièrement du S. Siege , l'affermissement duquel dépend de la conseruation & maintien des droits & prerogatives de la couronne de France. Je m'assure que le Pape se representant que toute la dispute ne regarde que le bien , & non les mœurs ny la religion , & qu'insensiblement il tire de France à Rome nostre or & argent pour du plomb : ce qui ne se pratiquoit sous la premiere lignée de nos Roys , & bien auant sous la seconde , & qu'on peut faire remonter les choses à leur source , ou reduire à leur premiere nature , il se contiendra dans l'ordre auquel luy & nostre Roy viuent.

DE QUELQUES ACTES QUE

*Les Papes ont voulu tirer à leur aduantage, &
un veritable discours de l'absolution de no-
stre grand HENRY.*

CHAPITRE. III.

JE crains que les Papes à l'aduenir se veüillent aduantager au desaduantage de nos Roys des ceremonies apportées en la benediction que

le Pape Clement 8. donna à nostre grand HENRY, apres qu'il se fut reduit au giron de l'Eglise : & qu'ils comptent telle action pour vn tiltre infallible, & acte de possession irrefragable. Car tout ce à quoy ils ont trauaillé iusques a present, ce n'a esté que pour paruenir à ceste haute & merueilleuse grandeur où ils sont éleuez. Et comme sages & prudens qu'ils ont esté, il ny a acte (quoy que ceux qui les mettoient en besongne, ny pensassent ny près ny loin) qu'ils n'ayent tiré aduantageusement à leur profit & éleuement. Je vous en représenteray icy quelques traits. Les grands du Royaume gaignez & solicitiez par Pepin, demanderent conseil au Pape Zacharie, s'ils doivent de posseder vn Roy seigneur, pour transferer le Royaume à vn tres capable, tres-vertueux. Zacharie leur ayant baillé son aduis, Pepin fut crée Roy par les Estats, lequel se fist oindre, sacrer, & couronner par le Pape, & Charlemaigne quant & quant. Et combien que ce premier acte ne fust qu'un conseil demandé, & ce second que pour donner plus de poids & d'autorité à l'enuahissement qu'ils auoient fait de l'Etat sur Charles le simple. Si est-ce que prenans ces deux actes pour vn tiltre de possession paisible, crurent de la pouuoir excommunier nos Roys, dispenser & absoudre leurs sujets du serment de fidelité, & transferer le Royaume à vn autre, & qu'il leur appartenoit de couronner, oindre & sacrer les Roys. Les Papes en leurs afflictions se retiroient de Rome en France, comme à vn port de salut asseuré. En 1095. Urbain 2. à leur exemple s'y rendit, pour se mettre à couuert contre les mauuais traitemens qu'il

receuoit du peuple Romain. & se reuanger de l'excommunication que l'Empereur Henry 3. auoit fait fulminer encontre luy en vn Concile d'Allemagne. Loys le Gros desirieux de décharger la France d'un tas de Seigneurs, qui en favorisant Pepin & ses successeurs s'estoient rendus souverains en leurs gouuernemens, qui luy estoient autant de compagnons en l'Estat, sollicita ce Pape de conuoquer en France vn Concile vniuersel, pour en iceluy exciter la Noblesse & autres à faire la guerre sainte, tous lesquels il rencontra disposez à faire le voyage d'outre mer. Si que celuy fut vn coup d'essay & de chef d'œuvre tout ensemble: car de là en auant, luy & ses successeurs s'aduantagerent de telle sorte de ce seul acte, qu'ils crurent pouuoit quand ils voudroient publier croisades, non seulement contre les infideles, mais quant & quant contre les Roys Chrestiens & autres. Ils la publierent contre les Albigeois, pour ruiner, disoient-ils, l'heresie. Et au lieu d'appliquer de bons, legitimes & salutaires remedes pour reduire ces deuoyez au giron de l'Eglise, ils remplirent le Languedoc & les pais circonuoisins de feu, de sang, & de carnage, où les hommes, femmes, enfans, innocens & coupables ne furent épargnez. Ne proposerent-ils pas à Rome de ne donner iamais l'absolutiō à nostre grand Henry, qu'il n'eust esté rehabilité par la Pape? Par cēt acte les Papes n'eussent-ils pas pretendu qu'ils conféroient les Royaumes? Ne fussent-ils pas demeurez fermes en ceste erronée oppinion, sans que d'Ostiat dist couragement au Pape & aux Cardinaux qu'au temporel, nos Roys n'auoient recogneu au

tre que Dieu dessus eux, comme il est mesme testi-
 moigné par les Papes au droict Canon, par les de-
 clarations faites autrefois és Estats generaux, &
 autres assemblées du Clergé & de l'Eglise Galli-
 cane, les Arrests des Cours souueraines, les iuge-
 mens de toutes autres Compagnies qui ont au-
 thorité au Royaume, & la voix & consentement
 vniuersel de tous les François. Tout ainsi que les
 Papes ont tourné ces actes à leur aduantage, ie ne
 doute point qu'ils ne fussent le semblable de ces
 ceremonies. Mais afin que la posterité sçache au
 vray les artifices qu'apporta le Pape pour paruenir
 à son dessein, & preuenir celuy des Procureurs du
 Roy ie vous conteray l'histoire au vray, laquelle
 apprendra aux Roys & Princes, combien il est
 dangereux & de perilleuse conséquence de laisser
 manier leurs affaires de poids à vn personnage
 outré d'une auengle & impatience ambition, &
 qui n'a deuant les yeux que son eleuement aux di-
 gnitez & grandeurs. En l'an 1594. nostre grand
 Henry s'estant rendu Catholique Apostoque &
 Romain, l'année ensuiuante, ayant reconquis
 par ses iustes armes presque toute la France, de-
 pescha du Perron avec procuration sous son nom,
 & celuy d'Ollat, pour mesuager la benediction
 qu'il desiroit receuoir du Pape, & sa reconciliation
 avec le S. Siege. d'Ollat nourry en Italie il y auoit
 vingt ans & plus, representa au Perron que la
 volonté du pape estoit plus portée à donner la
 benediction au Roy, que le Roy mesme à la de-
 mander, & qu'ils deuoient garder de se laisser em-
 porter à aucunes submissions, que la patience
 leur feroit faire conqueste de chose qui retourne-

roit de tout point à l'honneur du Roy & de la France, & que pendant le long-temps qu'il auoit vescu en ce pais, il auoit appris & les mœurs & humeurs des Italiens, mais que ce climat là éleuoit des esprits plus subtils que celuy de la France, & que leurs nations se gouernoient plustost par conseils rusez qu'autrement, & qu'en temporisant ils obtiendroient tout ce que le Roy desiroit : qu'il estoit meilleur de faire perte de quelque espace de temps, que de l'honneur de leur Prince en s'engageant à des submissiōs trop venalles pour la grandeur de leur maistre. Beau, bon & sage conseil & digne de ce venerable personnage vrayement François, qui aymoit & l'honneur de son Roy & de son Estat. Du perron & d'Ossat s'employèrent à bon escient à gaigner de la gloire en cette entreprise, en receuant ceste benediction sans faire breche à l'honneur & grandeur des Roys. Le Pape de son costé traualloit à la donner, avec tout l'auantage qu'on peut tirer pour l'honneur, grandeur & dignité des Papes. Ils n'ont iamais rien laissé en arriere de ce qu'ils ont pensé pouuoir seruir à l'accroissement de leur autorité. Le Pape pour accomplir son dessein, employa toutes sortes d'artifices pour les faire condescendre à diuerses submissiōs, lesquelles paroissant prejudicier à nos Roys, firēt vn refus absolu de se submettre à aucunes conditions & ceremonies exterieures qui eussent quelque apparence de s'abbaïsser au dessous de la dignité du Roy leur maistre. Le Pape, quoy que la faction d'Espagne fust fort contraire à ceste reconciliation, ne s'oublia à rechercher les moyens pour paruenir au but de son intention.

tention. Et voyant qu'au Consistoire, qui auoit esté fait pour c'est affaire à S. Iean de Latran, il auoit rencontré les volonteiz de la plus part des Cardinaux fort éloignées de ceste benediction, i. resolut de les gagner vn à vn. Le hazard aida à son entreprise : car en mesme temps se sentant trauillé du mal des gouttes, il donna ordre que chacun des Cardinaux viendroient les vns apres les autres pour aduiser avec luy des affaires Françoises. Le Pape auoit pour confidens les Cardinaux de Tolède & Baronius : lesquels pour l'affection qu'ils portoient au repos de la Chrestienté, estoient grâdemment chers de luy : & les auoit proche de sa personne pour combatre de raison ceux qui s'opposeroient à vne tant loüable entreprise. Le Pape fiant par sa prudence & bon conseil, qu'il disposa tous les Cardinaux à ceste reconciliation, en les faisant resouuenir des paroles que Nestor pronôça, voyant la discorde particuliere qui suruint au siege de Troye entre Agamemnon & Achilles. O que nos ennemis les Troyens, disoit-il, se réjouiront, entendans la diuision qui est entre les deux plus vaillants Princes de la Grece ! De mesme (dit le Pape) quelle réjouissance croyez-vous qu'auront les Heretiques nos ennemis sçachans la discorde & irreconciliation qu'il y a entre le pere & le premier fils de l'Eglise ? de faire ce que nos ennemis desirent, c'est fomenteur leur dessein, & destruire le nostre. Que dira-t'on de voir que l'Eglise, laquelle deuroit entretenir la paix, nourrisse contre elle-mesme la discorde ? Telle opiniatreté donc ne produisant à nos ennemis que du contentement elle ne nous peut apporter que de la

ruine. Ces remonstrances eurent tant d'efficace sur tous les esprits des Cardinaux, que les vns apres les autres consentirent à ceste reconciliation. Le Pape pour disposer du Perron & d'Ossat à faire ce qu'il projettoit: pratiqua le mesme conseil dont il se seruit enuers les Cardinaux: Car voyant qu'il ne les pouuoit gagner à se submettre, joints & vnis, à aucun chastiment Ecclesiastique, il fit prier du Perron à banqueter avec quelques Cardinaux: là, par quelques particuliers discours, cet esprit ambitieux fut disposé à des conditions qui sembloient apporter quelque temperament entre la dignité de l'Eglise & de la Majesté de nos Roys. Comme du Perron fut resolu à se submettre aux conditions quel'on luy presenta, le Pape enuoya querir d'Ossat present du Perron, & commença à se conjoindre du consentement qu'ils auoient rendu aux submissiōs Ecclesiastiques, en leur disant; Dimanche prochain tout s'acheuera. D'Ossat insistant au contraire, témoigna n'auoir consenty à aucunes ceremonies. Le Pape neantmoins reitera ces paroles, à Dimanche prochain. Comme du Perron fut de retour de Rome, aliant à Monceaux rendre conte de la charge au Roy: vn mien amy luy dit, que le Roy seroit en colere du rabaissement qu'il auoit fait le iour des ceremonies de la benediction. Il rejeta le blasme sur d'Ossat. Mais la procedure que ie vous ay rapportée & de l'un & de l'autre, telmoigne à qui en doit demeurer le reproche. La verité est que du Perron déguisa de telle sorte l'affaire que le Roy ne sceut au vray, comme elle s'estoit passée, que deux ans apres, Tout ce qui se ménagea le iour de cette benedi-

tion se doit entierement donner à l'ambition de du Perron qui aspiroit à vn chapeau rouge, se laissant contre l'opinion & volonté de d'Ossat, emporter aux persuasions & promesses du Pape. Qui est vn exemple par lequel nos Roys se doiuent rendre sage pour sonder au vis ceux qu'ils employent à negotier avec les estrangers leurs affaires les plus importantes : & bien considerer si aux dépens, & deshonneur de leur Maistre ils ne feront point les leur : Ainsi que fit du Perron qui depuis fut Cardinal.

Ayant representé briefuement la naissance & le progrès de ceste grande puissance des Papes : par lé des libertez de nostre Eglise Gallicane, & finalement faict voir quelques actes qu'ils ont tiré à leur aduantage & desdauantage de nos Roys. Je vous diray maintenant que ie ne scaurois assez haut louer ceste courageuse Censure de la pernicieuse & damnable doctrine de Sanctarellus Iesuite, tant nuisible aux Roys & Princes, donnée par vostre venerable Faculté de la Sorbonne, laquelle nous auons prise & apprise dès la naissance de nostre France. Qui nous rémoigne (qu'encores que nostre Estat soit grandement malade, & comme aux abois par tant de scelerates opinions que nos nouveaux hostes glissent dans les cruelles foibles) que plusieurs sont restez de ce vieil tige de nos bons Docteurs, qui font & feront fleurir & rebourjonner les maximes lesquelles ont conserué nos Roys contre les entreprises des Papes.



CENSURE DE LASACRE'E.

Faculté de Theologie de Paris, contre la puissance temporelle du Pape.

LE premier iour d'Auril 1626. apres la Messe du saint Esprit, l'assemblée s'estant faite à l'accoustumée en la salle du College de Sorbonne, touchant le liure impie de Sanctarely Iesuiste, oüy le rapport des Docteurs que la Faculté auoit deputez, lesquels ont exposé qu'es deux chapitres qui leur auoient esté marquez, estoient contenues les propositions suiuanes; Que le Pape peut punir les Roys & les Princes de peines temporelles, les désposer & priuer de leur Royaume & Estats pour crime d'heresie, & deliurer leurs sujets, de leur obeissance: & que telle à tousiours esté la coustume de l'Eglise. Et non seulement pour l'Heresie, mais encores pour d'autres causes; à sçauoir, Pour leurs pechez. S'il est ainsi expedient: Si les Princes sont negligens: S'ils sont incapables & inutiles. De plus; Que le Pape à la puissance sur les choses spirituelles, & sur toutes les temporelles: & qu'il à ceste puissance de droit diuin. Qu'il faut croire que le pouuoir à esté donné à l'Eglise & à son souuerain Pasteur, de punir de peines temporelles, (les Princes) qui pechent contre les Loix diuines & humaines: particulierement si leur crime est vne heresie. Ils ont aussi dit que Sanctarely afferme; Que les Apostres estoient bien de fait

sujets aux princes seculiers, mais non 'de droit, &
 mesme qu'aussi-tost que la Majesté du souverain
 Pontife a esté établie, tous les Princes luy ont esté
 sujets. *Bref, ils ont rapporté que cet Authheur ex-
 plique ces paroles de Iesus Christ, Matth. 16. Tout
 ce que vous lirez sur la terre &c. non seulement
 de la puissance spirituelle, mais aussi de la tempo-
 relle: & qu'il corrompt le texte de S. Paul. 2. ad
 Corinth. 10. (Potestatem) dedit nobis Dominus
 in ædificationem & non in destructionem. en re-
 tranchant une negation, & fait dire à plusieurs au-
 theurs qu'il cite, des choses à quoy ils n'ont iamais
 pensé: Concluans que, tant ces choses, que plu-
 sieurs autres qu'ils ont rapportées, meritoient tref-
 justement la correction & la Censure de la Faculté.
 Monsieur le Doyen ayant donc mis la chose en de-
 liberation, pres aue les opinions de tous les Do-
 cteurs ont esté ouïes, & leurs voix recueillies; La
 Faculté a improuué & condamné la doctrine con-
 tenuë en ces propositions & aux conclusions desdits
 chapitres, comme estant nouvelles, fausse, erronnée,
 & contraire à la parole de Dieu, qui rend la di-
 gnité du Souuerain Pontife odieuse, & ouure le
 chemin au schisme; qui déroge à l'autorité souue-
 raine des Rois, qui ne depend que de Dieu seul, &
 empesche la conuersion des Princes infideles & he-
 retiques; qui trouble la paix vniuerselle, & renuer-
 se les Royaumes, les Estats, & les Republiques;
 Bref, qui détourne les sujets de l'obeïssance qu'ils
 doiuent à leurs Souuerains, & les induit à des fa-
 ctions rebellions, & séditions; & à attenter à la
 vie de leurs Princes. Fait en Sorbonne. les iours
 & an que dessus, & reueu le 14. Avril. 1626.*

Par le mandement de Messieurs les Doyen &
Docteurs de la Sacrée Faculté de Theologie de Paris.

Signé.

P. H. BOYVOT.

LE Pape s'est grandement vlcéré de ceste Censure. Et comme les Italiens sont sages en leurs conseils; Il manda tous les generaux des Ordres, & leurs commanda d'escire à tous les Docteurs de leurs ordres de se retrouver dans Paris, & ne manquer à aucune assemblée de la Sorbonne sur peine d'innobedience, & de pruation de voix active & passive en toutes deliberations, pour ne laisser rien passer qui peult de sauthoriser ceste souveraine puissance, mesme tous les moyens de faire changer ou reuoquer ceste Censure *usque ad sanguinis effusionem*. Conseil qui fut mis en œuvre à l'assemblée tenuë le premier Iuillet 1626. où se rencontrerent vingt deux Moines, qui tous n'eurent qu'une voix, pour empescher la Censure d'un liure plein d'herésie & impietez. A telle caballe le Roy peut remedier par le mesme conseil du Pape en mandant & commandant aux Provinciaux de chaque Ordre, de rappeler leurs Moines qui ne s'ot qu'à dessain à Paris pour ruiner & auillir son autorité: où bien defendât absolument de plus remüer cette question, si solemnellement arrestée par tant d'excellens personnages & si gens de bien. Voila les moyens pour ruiner le plan de ceste dangereuse caballe, mais le dernier ferme & la bouche & la porte aux emis-

faïres de ceste nouuelle doctrine. Si ces bons Docteurs veulent bien faire, pour ne tomber plus sous la misericorde de ces cabalistes, qu'ils fassent de deux choses l'une, ou que tant de Moines ne seront plus receus en leur Compagnie, ou qu'il n'y en aura qu'un de chaque Ordre qui aura voix deliberatiue en leurs assemblées selon leurs statuts ce qu'ils doiuent faire confirmer par Arrest de la Cour.

F I N.

